

VENDIM
Nr. 209, datë 26.1.2012

**PËR PROCEDURËN E DHËNIES SË AUTORIZIMIT PËR MAGAZINIMIN, TRANSFERIMIN
DHE ASGJËSIMIN E LËNDËVE PLASËSE, PËR PËRDORIM CIVIL**

Në mbështetje të nenit 100 të Kushtetutës, të pikës 1 të nenit 9 të ligjit nr. 9126, datë 29.7.2003 “Për përdorimin civil të lëndëve plasëse në Republikën e Shqipërisë”, të ndryshuar, me propozimin e Ministrit të Brendshëm, Këshilli i Ministrave

VENDOSI:

1. Autorizimin për magazinimin, transferimin dhe asgjësimin e lëndëve plasëse për përdorim civil, për personat fizikë ose juridikë, privatë apo publikë, vendas ose të huaj, jepet nga komisariati i policisë së rrethit, ku subjekti zhvillon aktivitetin me lëndë plasëse.

2. Personi fizik ose juridik, që kërkon të pajiset me autorizim për magazinimin, transferimin dhe asgjësimin e lëndëve plasëse për përdorim civil, duhet të plotësojë këto kritere:

- a) Të jetë i specializuar në veprimtarinë e lëndëve plasëse;
- b) Të mos jetë në ndjekje penale ose në proces gjyqësor penal;
- c) Të ketë zotësi të plotë mendore dhe fizike për të vepruar;
- ç) Të ketë vendbanimin ose selinë në territorin e Republikës së Shqipërisë;
- d) Të mos jetë i dënuar me vendim gjykatë të formës së prerë për një çështje penale.

3. Verifikimi i kriterëve të lartpërmendura bëhet nga komisariatet e policisë së rrethit ku subjekti zhvillon aktivitetin me lëndë plasëse, në përputhje me legjislacionin në fuqi për fushat përkatëse sipas këtij dokumentacioni:

- a) Fotokopjes së noterizuar të diplomës së drejtuesit teknik dhe të kontratës së tij me subjektin;
- b) Fotokopjes së noterizuar të dëshmisë së zjarrmëtarit;
- c) Vërtetimeve të prokurorisë dhe gjykatës;
- ç) Raportit mjekësor ku të vërtetohet gjendja fizike dhe psikike;
- d) Ekstraktit të regjistrimit tregtar dhe atij historik për të dhënat e subjektit në Qendrën Kombëtare të Regjistrimit;

dh) Dëshmisë së penalitetit.

4. Subjekti i interesuar, që kërkon të pajiset me autorizim për miratimin e depos/depove të magazinimit të lëndëve dhe materialeve plasëse për përdorim civil, dorëzon në komisariatet e policisë së rrethit, ku është ndërtuar depoja/depot, këto dokumente:

a) kërkesën me shkrim, duke përcaktuar vendndodhjen e objektit, llojin, kapacitetin mbajtës për lëndë plasëse, kapsolla e fitila, të depos dhe afatin e përdorimit të saj;

b) dokumentin e identifikimit të personit fizik ose të përfaqësuesit ligjor të subjektit;

c) pëlqimin nga bashkia ose komuna që ka në juridiksion depon/t, në të cilën do të magazinohen dhe ruhen lëndët plasëse për përdorim civil;

ç) fotokopjen e noterizuar të lejes së ndërtimit të depos/depove, ku përcaktohet “objekt sipërfaqësor për magazinimin e lëndëve plasëse për përdorim civil me koordinata: x,y,z”;

d) atkologjimin e objektit, të nënshkruar nga specialist inxhinier miniere, që përcakton se objekti i ndërtuar i plotëson kushtet për magazinimin e lëndëve plasëse për përdorim civil, në përputhje me rregulloren e teknikës së sigurimit të lëndëve plasëse për përdorim civil në Republikën e Shqipërisë;

dh) projektin teknik të hartuar nga institucionet projektuese përkatëse, të miratuar në repartin e inspektim-shpëtim-minierave, (RISHM) edhe në rastet kur objekti është i adoptuar, që përcakton se objekti i plotëson kushtet për magazinimin e lëndëve plasëse për përdorim civil, në përputhje me rregulloren e teknikës së sigurimit për përdorimin civil të lëndëve plasëse në Republikën e Shqipërisë, si dhe aktin e pronësisë së objektit ose kontratën e qirasë;

e) kontratën e lidhur me Shërbimin e Ruajtjes dhe Sigurisë Fizike, për ruajtjen e depos/depove të

lëndëve plasëse, ku të pasqyrohet numri i vendrojave së bashku me kohën (orarin) e shërbimit.

5. Shqyrtimi i dokumentacionit për miratimin e depos/depove për magazinimin e lëndëve plasëse për përdorim civil dhe kthimi i përgjigjes bëhet nga komisariati i policisë, brenda 25 (njëzet e pesë) ditëve nga data e aplikimit për marrjen e tij.

6. Autorizimi për magazinimin e lëndëve plasëse përcakton specifikisht kapacitetin mbajtës për lëndë plasëse, kapsollë dhe fitila.

7. Subjekti i interesuar, që kërkon të pajiset me autorizim për transferimin e lëndëve dhe materialeve plasëse për përdorim civil, depoziton në komisariatën e policisë së rrethit, ku ndodhet depoja/t e miratuara, këto dokumente:

a) kërkesën me shkrim për transferimin e lëndëve dhe materialeve plasëse për përdorim civil (7 ditë para, kur transferimi do të bëhet brenda vendit dhe 10 ditë, përpara ditës së mbërritjes në pikat e kalimit kufitar, kur vijnë nga jashtë vendit), në të cilën të përcaktohen: emri i zjarmëtarit, drejtuesit të automjetit, tipi dhe targa e automjetit, sasia e ndarë për lëndë plasëse, kapsolla dhe fitila që do të transferohen, vendi i tërheqjes, subjekti furnizues dhe subjekti përdorues, adresa e depos ku do të magazinohet, itinerari i lëvizjes dhe data e transferimit;

b) fotokopjen e noterizuar të autorizimit për përdorim civil të lëndëve plasëse, lëshuar nga Ministria e Ekonomisë, Tregtisë dhe Energjetikës;

c) fotokopjen e autorizimit të miratimit të depos/depove për magazinimin e lëndëve dhe materialeve plasëse për përdorim civil, miratuar nga komisariati i policisë, në të cilën do të magazinohet lënda/materialet plasëse për përdorim civil;

ç) kontratën me një subjekt tjetër, të miratuar nga komisariati i policisë, për magazinimin e lëndëve dhe materialeve plasëse, kur subjekti nuk disponon depo;

d) fotokopjen e lejes së drejtimit të drejtuesit të automjetit, sipas kriterëve të përcaktuara në rregulloren e teknikës së sigurimit për përdorimin civil të lëndëve plasëse në Republikën e Shqipërisë;

dh) kontratën me Shërbimin e Ruajtjes dhe Sigurisë Fizike dhe fotokopjen e lejes së armës së zjarrit të punonjësit që do të kryejë shoqërimin, gjatë transferimit të lëndëve plasëse për përdorim civil;

e) aktkollaudimin teknik të posaçëm për automjetin e transportit, sipas kriterëve të përcaktuara në rregulloren e teknikës së sigurimit për përdorimin civil të lëndëve plasëse në Republikën e Shqipërisë.

8. Shqyrtimi i dokumentacionit për transferimin e lëndëve plasëse për përdorim civil dhe kthimi i përgjigjes bëhet nga komisariati i policisë brenda 7 (shtatë) ditëve, kur transferimi kryhet brenda vendit dhe 10 (dhjetë) ditëve, kur lëndët plasëse vijnë nga jashtë vendit.

9. Subjektet që kërkojnë paraprakisht të pajisen me autorizim për transferimin e lëndëve plasëse për përdorim civil, me qëllim pajisjen nga Ministria e Mbrojtjes me licencë për import, eksport dhe prodhim të lëndëve plasëse për përdorim civil, duhet të paraqesin këto dokumente në komisariatën e policisë;

a) kërkesën me shkrim, në të cilën të përcaktohen tipi dhe targa e automjetit, si dhe kapaciteti mbajtës i lëndës plasëse, kapsolla dhe fitila;

b) fotokopjen e lejes së drejtimit të drejtuesit të automjetit, sipas kriterëve të përcaktuara në rregulloren e teknikës së sigurimit për përdorimin civil të lëndëve plasëse në Republikën e Shqipërisë;

c) aktkollaudimin teknik të posaçëm për automjetin e transportit, sipas kriterëve të përcaktuara në rregulloren e teknikës së sigurimit për përdorimin civil të lëndëve plasëse në Republikën e Shqipërisë.

10. Shqyrtimi i dokumentacionit për pajisjen me autorizim për transferimin e lëndëve plasëse për përdorim civil, sipas pikës 9 të këtij vendimi, bëhet nga komisariati i policisë brenda 25 (njëzet e pesë) ditëve nga data e aplikimit për marrjen e tij.

11. Subjekti i interesuar, që kërkon të pajiset me autorizim për asgjësimin e lëndëve dhe materialeve plasëse për përdorim civil të skaduara, si dhe mbeturinave të tyre, depoziton në komisariatën e policisë së rrethit, ku do të kryhet asgjësimi, këto dokumente:

a) kërkesën, në të cilën përcaktohen vendi, koha, mënyra e asgjësimit, sasia e ndarë për lëndë plasëse, kapsolla dhe fitila, drejtuesi teknik dhe emrat e stafit teknik që do të merret me asgjësimin e këtyre lëndëve, të shoqëruara me dëshmitë përkatëse;

b) autorizimin për përdorimin civil të lëndëve plasëse, nga Ministria e Ekonomisë, Tregtisë dhe

Energjetikës;

c) aktin e vlerësimit për sigurimin teknik, ku të përcaktohet se asgjësimi i lëndëve plasëse nuk rrezikon apo dëmton jetën e njerëzve, kafshëve dhe vlerave materiale përreth, të firmosur nga specialistët përkatës;

ç) autorizimin nga agjencia rajonale për mbrojtjen e mjedisit;

d) autorizimin nga Policia e Mbrojtjes nga Zjarri dhe të Shpëtimit;

dh) autorizimin nga bashkia ose komuna që ka në juridiksion vendin ku do të asgjësohen lëndët plasëse.

12. Në vendin ku do të kryhet asgjësimi i lëndëve plasëse, për përdorim civil, të skaduara, si dhe të mbeturinave të tyre, në varësi të mënyrës së asgjësimit, subjekti merr masa të plota për sigurimin teknik të mjedisit përreth, me qëllim parandalimin e ngjarjeve aksidentale, që mund të shkaktohen nga vala goditëse e shpërthimit apo nga zjarri, me pasoja për jetën e njerëzve, kafshëve dhe vlerave materiale.

13. Shqyrtimi i dokumentacionit për asgjësimin e lëndëve dhe materialeve plasëse të përdorimit civil të skaduara, si dhe të mbeturinave të tyre dhe kthimi i përgjigjes bëhen nga komisariati i policisë brenda 10 (dhjetë) ditëve nga data e aplikimit për marrjen e tij.

14. Policia e Shtetit, për qëllimet e përcaktuara në këtë vendim, ka të drejtë të kryejë kontrolle dhe verifikime, rast pas rasti, në depot e magazinimit, gjatë transferimit dhe asgjësimit të lëndëve plasëse për përdorim civil.

15. Autorizimi për magazinimin, transferimin dhe asgjësimin e lëndëve plasëse për përdorim civil hiqet nga Policia e Shtetit, në rastet:

a) kur subjekti, gjatë magazinimit, transferimit dhe asgjësimit shkel rregullat e sigurisë teknike, të parashikuara në rregulloren e teknikës së sigurimit për përdorim civil të lëndëve plasëse në Republikën e Shqipërisë dhe kriteret e përcaktuara në këtë vendim, duke rrezikuar jetën e njerëzve, kafshëve dhe vlerave materiale;

b) kur subjekti kryen veprë penale që lidhet me ushtrimin e veprimtarisë së magazinimit, transferimit dhe asgjësimit.

16. Ngarkohen Ministria e Brendshme dhe Drejtoria e Përgjithshme e Policisë së Shtetit për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

Sali Berisha